

# Musa: Awas komunis cuba tawan hati Melayu

**JOHOR BAHRU, Selasa** — Timbalan Perdana Menteri, Datuk Musa Hitam mengingatkan tentang bahaya pergerakan anasir-anasir komunis yang cuba menembusi kubu orang-orang Melayu beragama Islam.

"Mereka sedar, untuk bertapak dan berkuasa di negara ini, mereka harus mempengaruhi dahulu orang-orang Melayu.

"Tanda-tanda sudah menunjukkan bagaimana anasir-anasir komunis sudah mula bergerak dalam percubaan untuk menembusi kubu orang Melayu yang beragama Islam."

katanya.

Katanya anasir-anasir komunis sudah pandai memberi salam dan oleh itu orang-orang Melayu haruslah berwaspada supaya tidak terperangkap dengan dakwah anasir tersebut yang bertopengkan Islam.

## Berazam

Datuk Musa berucap demikian dalam jamuan anjuran kerajaan negeri dan Barisan Nasional Johor untuk meraikan perlintikannya sebagai Timbalan Perdana Menteri, di kediaman Menteri Besar, Tan Sri Haji Othman Saat, di sini malam tadi.

Lima ribu jemputan meliputi menteri dan wakil rakyat dari Johor, pegawai-pegawai kanan kerajaan, pemimpin parti komponen Barisan Nasional dan pemimpin masyarakat menghadiri majlis tersebut.

Datuk Musa mengingatkan perjuangan Parti Komunis Malaya (PKM), meskipun telah menghadapi kebuntuan, tetapi ia masih berazam untuk menegakkan pengaruh mereka di negara ini dengan menyeludupi mana-mana pihak yang dapat membantu mereka menawan hati orang-orang Melayu.

Jika orang Melayu, badan-badan politik atau pertubuhan Islam kurang berhati-hati dan tidak sedar atas bahaya ancaman daripada pihak komunis yang telah mula menggunakan agama Islam, maka nanti berpecah belahlah orang Melayu, dan bermulalah kejatuhan dan kehancuran negara, katanya.

Datuk Musa yang juga Menteri Dalam Negeri berkata kenyataan sistem politik dan pentadbiran yang wujud di negara ini akan terus berteraskan kepada keutuhan UMNO.

Bagaimanapun beliau mengingatkan pemimpin-pemimpin UMNO tidak khayal dengan kuasa yang dipegang kerana kuasa tersebut adalah hasil dari sokongan dan kepercayaan rakyat kepada perjuangan UMNO.

Bahan asal dari Arkib  
Negara Malaysia